

Mer händ en Staatspräsident blöfft en Franzos du de het e Frau wo cha senge
jo ond mer seit de Dütsch händ sogar e Frau wo duets Zeppter schwenge
jo ond „yes we can“ seit der Amerikaner jetzt en Schwarze em wisse Gemäuer
da esch no gar nüt hani zo dene gseit euse neu Bondesrot esch wederchäuer

Wo eusi Armee Lüt gsuecht het em Kampf gäg d`Piratenflotte
jo do händ die doch os Versehe au no mech ufbotte
denne hanni aber grad d`Meinig gseit wosi me düend prüefe
aso schwemme channi de ned aber e 20 Sproche om Hilfe rüefe

De Peter Kurer jo de vo de Ubs lütet em Bondesrot a
chönnte mer äch besoguet nomol en Zueschoss ha
well met de erschte 6 Milliarde gots jetzt langsam z`Aend
nachdem mer allne euse Bosse do de Bonus uszahl händ

Do rüefed doch es paar Persone us well sie bem Bözbärg wänd Chalch abboue
die händs Gfühl mer wördi debie dert die ganzi Landschaft versoue
jo wäg dere Chesgrueb wo das get müend die doch ned verschrecke
die düens doch nochär sowiso met Atommöll zuedecke

Do fordere doch zwe Manne vo Brogg im Az-Regioblatt
emme grosse Inserat „neui Gsechter“ brucht die Stadt
drofabe meint de Alder Rolf was söll die ganzi Action
also do mach ich jo nömme met ich be doch ned de Michael Jackson

Bis jetzt beni emmer der Meinig gsi das z`Rinike alli Affe
oder andersch gseit so Type wen ich of de Gmei chönnte go schaffe
doch sed em letschte Johr do weis ich jetzt was för strängi Kriterie die wänd
die stelle jo nor no Persone i wo en Olympiamedaille händ

A de Seifecheschte Schwyzermeisterschaft do druf hätti au nie gwettet
do het is doch Gmeind Umike vor de gröschte Blamage grettet
well eusi ahnschienend vergässe händ d`Fahne z`hänke ad d`Fahnestange
händ die det onde fröndlecherwies eifach ehri chli länger lo hange

Dank eusne lgangstafele do wo jetzt stönd am Strosserand
esch Rinike jetzt händ er das gwösst of de ganze Wält bekannt
sogar en Asiat het die Tafele gseh ond de Sproch gläse wo stoht derte
ond het gseit mini liebe Lüt do he chomm ich cho werte

Ond en Sache Starchstromleitig do hani no de neuschti Brecht
eusi Isproch die goht zrog vom Bondes- as Verwaltungsgrecht
jo ergendwie do chonnts mer vor sig wie em alte Rom
also wenn das so witer goht semmer no länger onder Strom

Im Novämber Schnee ond Dezämber Schnee bes i die tüfschte Lage
im Januar de nomee Schnee ond nomee chalti Tage
em Februar de emmer no Schnee ond d`Bise hende dri
so das wär no min Schnetzelbank öber d`Klimaerwärmig gsi

Eusi Cracks send a de Ski-Wm dank de Lara weder richtig guet
ond sie fahred was Cucho was hesch wienis de Carlo Janka zeige tuet
d`Schiesprenger flüge ond de Cologna sprengtet of sine Langlaufschi
also du vo mer us chönnts hür s`ganz Johr Wenter si

Also mer 4 vo Komedi-Team nei mer wänd kei Worscht
aber nach em letschte Schnetzelbank hätte mer weder schampar dorscht
drom wäre mer froh wenn e huffe Lüt jetzt e Rondi wörded ufrüehre
damet mer zäme en Obe lang chönnd en Botellon dorefüehre

Der Komedi⁰⁹

Wänd er me bsueche? Ich be dehei onder „www.komedi.ch“

I ha no halber dänkt das er au Hür of e Zuegab warted wie versässe
doch zo miner Schand muess ich gestoh die hani vergässe
jetzt ghöri euch scho jommere ond gsenech met em Fenger of mech ziele
de ghört jo wie paar vo de Opus-C-Voll au scho zo de Senile